

Član 21.

Redari prate izvršenje naloženih mjera i radnji i o tom pregledu sačinjava kontrolni zapisnik.

Član 22.

Kontrolisani subjekt je dužan da u roku od tri dana od dana isteka roka za izvršenje naloženih mjera i radnji, obavijesti Redare da li su iste izvršene.

III - KAZNE NE ODREDBE**Član 23.**

Novčanom kaznom od 200,00 KM do 3.000,00 KM kazniće se pravno lice za počinjene prekršaje iz člana 9. tačke 1-6, 10-14, 16, 17, 20-24, 27-30, 32 i 33.

Za prekršaje iz stava 1. kazniće se i odgovorno lice u pravnom licu novčanom kaznom u iznosu od 50,00 KM do 300,00 KM, kao i fizičko lice koje obavlja obrtničke djelatnosti (obrtnik), a fizičko lice novčanom kaznom u iznosu od 50,00 KM do 150,00 KM.

Novčanom kaznom od 3.000,00 KM do 10.000,00 KM kazniće se pravno lice:

- ako Redarima ne daju tražene podatke, ne dostave na uvid isprave potrebne za vršenje kontrole ili ne dostave tražene podatke u ostavljenom roku;
- ne izvrši mjere i radnje naložene od strane Redara ili izvrši radnje koje su Redari zabranili;
- u ostavljenom roku ne obavijesti Redare u vezi izvršenja naloženih mjera;
- ako počinji prekršaje iz člana 9. tačka 7-9, 15, 18, 19, 25, 26 i 31;

Za prekršaje iz prethodnog stava kazniće se i odgovorno lice u pravnom licu novčanom kaznom u iznosu od 300,00 KM do 1.500,00 KM, kao i fizičko lice koje obavlja obrtničku djelatnost, a fizičko lice novčanom kaznom od 100,00 do 500,00 KM.

Novčanom kaznom od 30,00 KM do 150,00 KM kaznit će se fizičko lice za počinjene prekršaje iz tačke 5,6,8,9,10,11,13,28,29,30,32 i 33 člana 9. ovog Zakona.

Istom novčanom kaznom kaznit će se fizičko lice ako ne postupi po odredbama člana 23. stav 3.

IV - PRIJELAZNE I ZAVRŠNE ODREDBE**Član 24.**

Općinska vijeća su dužna uskladiti svoje propise iz oblasti komunalnih djelatnosti sa odredbama ovog zakona u roku od tri mjeseca od dana stupanja na snagu ovog Zakona.

Član 25.

Ovaj Zakon stupa na snagu osmog dana od dana objavljivanja u "Službenom glasniku Unsko-sanskog kantona".

Broj: 01-1-357/05
10. maja 2005. god.
B i h a ć

Predsjedavajuća Skupštine
Unsko-sanskog kantona
Dr. **Jasminka Durić**

586.

Na osnovu člana V.A.2.11.b) Ustava Unsko-sanskog kantona - Prečišćeni tekst ("Službeni glasnik Unsko-sanskog kantona", br. 1/04, 11/04), Skupština Unsko-sanskog kantona, na 34.sjednici održanoj dana 10.05.2005. godine, donosi

ZAKON**O IZMJENAMA I DOPUNAMA
ZAKONA O SUDSKIM TAKSAMAMA****Član 1.**

U Zakonu o sudskim taksama ("Službeni list Unsko-sanskog kantona", broj 3/97, i "Službeni glasnik Unsko-sanskog kantona", br. 6/98, 9/98, 4/03) vrše se izmjene i dopune, kako slijedi:

U članu 8. iza stava 3. dodaje se novi stav 4. koji glasi:

"Ako je takseni obveznik strano fizičko ili pravno lice, dužno je taksu na podnesak platiti na poziv suda, uz upozorenje da će se postupak kod suda nastaviti tek nakon što takseni obveznik dostavi sudu dokaz o uplati takse".

Član 2.

Član 9. mijenja se i glasi:

"Pravo na naplatu sudske takse zastarijeva u roku od dvije godine od dana pravosnažnog okončanja postupka u vezi kojeg je nastala taksena obveza".

Član 3.

U članu 10. stav 1. iza tačke 1. dodaje se nova tačka 2. koja glasi:

"ustanove za socijalni rad, u postupcima oduzimanja poslovne sposobnosti i roditeljskog prava,"

U dosadašnjoj tački 2., iza zareza dodaje se tekst: "kada je u pitanju statusni spor."

Dosadašnje tačke 2. do 7. postaju tačke 3. do 8.

Član 4.

Član 38. mijenja se i glasi:

"Ako takseni obveznik - fizičko lice ne plati taksu u roku određenom u čl. 36. i 37. ovog zakona, dalji postupak prinudne naplate takse provodi nadležan sud, u skladu sa Zakonom o izvršnom postupku".

Član 5.

Član 39. briše se.

Član 6.

U članu 46. tarifni broj 2., u tački 2. riječ: "izostanka" zamjenjuje se riječju: "propuštanja".

U tački 3. riječi: "odnosi po čl. 288 stav 2." zamjenjuju se riječima: "donosi po članu 227. st. 2. i 3.".

Tačka 4. briše se.

Tarifni broj 8., u tački 2. Napomene, slovo "o" zamjenjuju se slovom "u".

Član 7.

Iza poglavlja i naslova: "ZEMLJIŠNO-KNJIŽNI POSTUPAK" dodaje se novi podnaslov i riječi:

"1. Uvid u zemljišnu knjigu

Uvid u zemljišnu knjigu se ne naplaćuje".

Redni broj "1." ispred podnaslova "Podnesci" zamjenjuje se rednim brojem "2."

Tarifni broj 13. mijenja se i glasi:

"Za preuzimanje zahtjeva za uknjižbu i brisanje naplaćuje se sudska taksa u iznosu od 20 KM.

Za izdavanje neovjerenog prepisa ili izvatka naplaćuje se taksa u iznosu od 5 KM, a za izdavanje ovjerenog prepisa ili službenog izvatka naplaćuje se taksa u iznosu od 10 KM.

Za dopune i potvrde prepisa i izvadaka naplaćuje se ista taksa kao i za njihovo izdavanje.

Za davanje informacija kao i obavještenja ne naplaćuje se sudska taksa ni dodatni troškovi."

Podnaslov: "2. Upis" zamjenjuje se podnaslovom: "3. Uknjižba"

Tarifni broj 14. mijenja se i glasi:

"Sudsku taksu snosi osoba u čiju korist se vrši uknjižba, osim ako ugovorne strane ne utvrde drugačije.

Visina takse određuje se prema vrsti i vrijednosti pravnog posla, kako slijedi:

1. Uknjižba vlasništva 0.2%;
2. Uknjižba hipoteke, zemljišnog duga ili doživotnog prava uživanja, trajnog stanarskog prava, trajnog prava korištenja, stvarnih služnosti i tereta, pravo dugoročnog najma i zakupa, prava preče kupovine i realnih tereta 0.2 %;
3. Uknjižba hipoteke za odobravanje kredita za privrednu djelatnost 0.2 % od vrijednosti kredita;
4. Minimalni iznos sudske takse za uknjižbu 50 KM;
5. Maksimalni iznos sudske takse za uknjižbu 100.000 KM;
6. Uknjižba predbilježbe ili zabilježbe naplaćuje se paušalno 50 KM;

Ako ne postoji vrijednost pravnog posla, naplaćuje se minimalna taksa."

Član 8.

Iza člana 49. dodaje se novi član 49a. koji glasi:

"Sudske takse zastarjele na dan stupanja na snagu ovog zakona, neće se prinudno naplaćivati".

Član 9.

Ovaj zakon stupa na snagu osmog dana od dana objavljivanja u "Službenom glasniku Unsko-sanskog kantona".

Broj: 01-1-358/05
10. maja 2005. god.
B i h a ć

Predsjedavajuća Skupštine
Unsko-sanskog kantona
Dr. **Jasminka Durić**

587.

Na osnovi člana 11 poglavlja V A Ustava Unsko-sanskog kantona - prečišćeni tekst ("Službeni glasnik Unsko-sanskog kantona" broj 1/04), Skupština Unsko-sanskog kantona, na 34.sjednici održanoj 10. maja 2005.godine, donijela je

ODLUKU

Član 1.

Ovom odlukom se raspoređuju finansijska sredstva Budžeta Unsko-sanskog kantona za 2005.godinu u iznosu od 1.000.000,00 KM a koja su namijenjena za rekonstrukciju i investiciono održavanje školskih objekata na području Unsko-sanskog kantona.

Raspodjela sredstava iz prethodnog stava vršiće se prema načinu raspodjele koji je u prilogu odluke.

Član 2.

Ova Odluka stupa na snagu danom objavljivanja u "Službenom glasniku Unsko-sanskog kantona".

Broj: 01-1-369/05
10. maja 2005. god.
B i h a ć

Predsjedavajuća Skupštine
Unsko-sanskog kantona
Dr. **Jasminka Durić**